

Կ Ա Ր Գ

ՄՇԱԿՈՒԹԱՅԻՆ ԱՐԺԵՔՆԵՐԻ ԿՐԿՆԱԿԻ ՓՈՐՁԱՔՆՆՈՒԹՅԱՆ

1. Սույն կարգով սահմանվում է մշակութային արժեքների կրկնակի փորձաքննության (այսուհետ՝ կրկնակի փորձաքննություն) կարգի հետ կապված հարաբերությունները:

2. Հայաստանի Հանրապետության կրթության, գիտության, մշակույթի և սպորտի նախարարություն (այսուհետ՝ լիազորված պետական մարմին) արտահանման նպատակով հայտագրված մշակութային արժեքը կամ առարկան ենթակա է կրկնակի փորձաքննության, եթե առկա է մշակութային արժեքի կամ առարկայի կեղծ և լիազորված պետական մարմին ներկայացված սկզբնական փորձաքննության (այսուհետ՝ սկզբնական փորձաքննություն) խեղաթյուրված լինելու վերաբերյալ հիմնավոր կասկած:

3. Կրկնակի փորձաքննությունն իրականացնում են լիազորված պետական մարմնի կողմից հավատարմագրված մշակութային արժեքների փորձաքննություն իրականացնող մասնագետները (այսուհետ՝ փորձագետ) և մշակութային արժեքների փորձաքննություն իրականացնող կազմակերպությունները (այսուհետ՝ կազմակերպություն):

4. Կրկնակի փորձաքննությունն իրականացվում է համալիր (ֆիզիկա-քիմիական) փորձաքննության եղանակով՝ տեխնիկական միջոցների կիրառմամբ (նյութակազմը վերլուծող սարքավորում, շարժական ֆլուորեսցենտ-ռենտգենային սարք, ինֆրակարմիր ռենտգենային օպտիկական սարք, բինոկուլյար միկրոսկոպ, բևեռացնող միկրոսկոպ):

5. Լիազորված պետական մարմինն արժեքի սեփականատիրոջը կամ նրա կողմից լիազորված անձին գրավոր տեղեկացնում է արժեքի կրկնակի փորձաքննության նշանակման մասին:

6. Լիազորված պետական մարմինը կազմակերպում է կրկնակի փորձաքննություն անցկացնելու գործընթացն իր միջոցների հաշվին:

7. Կրկնակի փորձաքննության առավելագույն ժամկետ է սահմանվում 15 աշխատանքային օրը՝ կրկնակի փորձաքննություն նշանակելու հաջորդող աշխատանքային օրվանից սկսած:

8. Կրկնակի փորձագիտական եզրակացությունը ներառում է՝

- 1) հերթական համարը (հնգանիշ).
- 2) կազմակերպության անվանումը.
- 3) արժեքի անվանումը.
- 4) արժեքի գիտական նկարագրությունը.
- 5) արժեքի ստեղծման տարեթիվը (թվագրումը), հրատարակման տարեթիվը.
- 6) արժեքի ստեղծման վայրը՝ երկիրը, հրատարակության վայրը, հրատարակչությունը.
- 7) արժեքի նյութը.
- 8) արժեքի ֆիզիկական չափսերը (երկարություն, լայնություն, բարձրություն, տրամագիծ), քաշը, հարգը, էջերի թիվը, տպաքանակը և այլն.
- 9) արժեքի պահպանվածությունը (ամբողջական, մասնակի, վերականգնված՝ մանրամասն նկարագրությամբ).
- 10) արժեքի պատրաստման տեխնիկան, տեխնիկական-տեխնոլոգիական բնութագիրը (ֆիզիկաքիմիական փորձաքննության արդյունքները).
- 11) հեղինակը (ստեղծողը).
- 12) արձանագրության, ստորագրության, դրոշմի, կնիքի վերձանությունը, հատուկ նշաններ.
- 13) ժողովուրդը, էթնիկական խումբը, դպրոցը.
- 14) արժեքի՝ իր տեսակի կամ տիպի մեջ առանձնահատուկ լինելը.
- 15) արժեքի՝ պատմական, հնագիտական, ազգագրական, գեղարվեստական, կրոնական, մշակութաբանական, արվեստաբանական կամ գիտական հատուկ հետաքրքրություն ներկայացնելը.

16) արժեքի՝ պատմամշակութային զարգացման վկայագիր-վավերագրի նշանակություն ունենալը.

17) արժեքի՝ ազգային պատմամշակութային ժառանգության համար կարևոր նշանակություն ունենալը.

18) համաշխարհային մշակութային ժառանգության համար հետաքրքրություն ներկայացնելը.

19) գինը (Հայաստանի Հանրապետության արժույթով).

20) կազմակերպության կնիքը և ստորագրությունները (կազմակերպության տնօրեն, փորձագետ).

21) տալու ամսաթիվը, ամիսը, տարեթիվը:

9. Կրկնակի փորձաքննություն չի կարող իրականացնել մշակութային արժեքի կամ առարկայի սկզբնական փորձաքննությունը կատարած կազմակերպությունն ու փորձագետը:

10. Լիազորված պետական մարմինն արժեքի սեփականատիրոջը կամ նրա կողմից լիազորված անձին գրավոր տեղեկացնում է արժեքի կրկնակի փորձաքննության արդյունքների մասին:

11. Կրկնակի փորձաքննության արդյունքները կարող են բողոքարկվել դատական կարգով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐԻ ՏԵՂԱԿԱԼ

Ա. ԽԱՉԱՏՐՅԱՆ